



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 14. stav (1) Zakona o finansiranju političkih stranaka («Službeni glasnik BiH» broj 22/00, 102/09 i 54/10), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06), a u skladu sa članom 18. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

IZVJEŠTAJ O REVIZIJI
GODIŠNJEG FINANSIJSKOG IZVJEŠTAJA ZA 2009. GODINU
BOSS - BOSANSKE STRANKE – Mirnes Ajanović

Broj: 03-07-6-99/10
Sarajevo, 27. januar 2011. godine

SADRŽAJ:

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS REVIZIJE	5
Predmet revizije	5
Cilj revizije	5
Obim revizije	5
4. PRETHODNE REVIZIJE	5
5. NALAZI I PREPORUKE	5
5.1. NALAZI	5
5.2. PREPORUKE	6

MIŠLJENJE REVIZORA

Služba za reviziju finansiranja političkih stranaka je izvršila reviziju godišnjeg finansijskog izvještaja političke stranke BOSS – Bosanska stranka – Mirnes Ajanović za 2009. godinu.

Rukovodstvo stranke je odgovorno za finansijske izvještaje, postupanje u skladu sa Zakonom o finansiranju političkih stranaka i uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo obavili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garancije da je stranka postupala u skladu sa Zakonom o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskom izvještaju, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

Revizijom smo utvrdili da BOSS – Bosanska stranka – Mirnes Ajanović u izvještajnom periodu nije postupila u skladu sa odredbama člana 8. stav (1) Zakona o finansiranju političkih stranaka.

Prema našem mišljenju, osim navedenog, revidirani finansijski izvještaji ukazuju da je BOSS – Bosanska stranka – Mirnes Ajanović u 2009. godini postupala u skladu sa odredbama Zakona o finansiranju političkih stranaka.

1. UVOD

Služba za reviziju finansiranja političkih stranaka je izvršila reviziju godišnjeg finansijskog izvještaja političke stranke BOSS – Bosanska stranka – Mirnes Ajanović za 2009. godinu.

Revizija je preduzeta u skladu sa članom 14. stav (1) Zakona o finansiranju političkih stranaka («Službeni glasnik BiH» broj 22/00, 102/09 i 54/10), članom 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08).

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja BOSS – Bosanska stranka – Mirnes Ajanović je ostvarila prihod u iznosu od 144.990,73 KM, što je iskazano u narednoj tabeli:

Red.br.	Vrsta prihoda	Iznos u KM	Učešće u ukupnom prihodu %
1	Članarina	0,00	
2	Prilozi fizičkih lica	0,00	
3	Prilozi pravnih lica	0,00	
4	Prihodi od imovine	152,19	0,10%
5	Prihodi od pr.lica	0,00	
6	Prihodi od poklona	0,00	
7	Prihodi iz budžeta	144.838,54	99,90%
	Ukupni prihodi:	144.990,73	100,00%

U godišnjem finansijskom izvještaju politička stranka je iskazala ukupne rashode u iznosu od 131.723,99 KM.

2. PREDSTAVLJANJE POLITIČKE STRANKE

Naziv političke stranke je BOSS – Bosanska stranka – Mirnes Ajanović. Skraćeni naziv stranke je BOSS. Stranka je registrovana 08.05.2006. godine u Općinskom sudu u Tuzli pod brojem 032-0-REG-06-000792.

Sjedište BOSS – Bosanske stranke – Mirnes Ajanović je u Tuzli, ulica Kojšino broj 7.

Lice ovlašteno za zastupanje stranke je Mirnes Ajanović, predsjednik stranke.

Lice ovlašteno za podnošenje finansijskih izvještaja za 2009. godinu je Nedžad Zonić.

Prema podacima iz godišnjeg finansijskog izvještaja za 2009. godinu, BOSS ima slijedeće organizacione odbore:

- Glavni odbor BOSS Tuzla i
- 24 opštinska odbora.

3. OPIS REVIZIJE

Predmet revizije je godišnji finansijski izvještaj za 2009. godinu BOSS – Bosanske stranke – Mirnes Ajanović i to slijedećih organizacionih dijelova:

- Glavni odbor BOSS Tuzla,
- Općinski odbor BOSS Sarajevo,
- Općinski odbor BOSS Mostar,
- Općinski odbor BOSS Donji Vakuf i
- Općinski odbor BOSS Zavidovići.

Cilj revizije je da revizoru omogući da izrazi mišljenje o tome da li je BOSS – Bosanska stranka – Mirnes Ajanović u izvještajnom periodu postupala u skladu sa odredbama Zakona o finansiranju političkih stranaka.

Obim revizije finansijskih izvještaja političke stranke BOSS – Bosanska stranka – Mirnes Ajanović obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE REVIZIJE

Služba za reviziju je izvršila pregled i reviziju godišnjih finansijskih izvještaja BOSS – Bosanske stranke – Mirnes Ajanović u periodu od 2005. do 2008. godine, nakon kojih su izdati izvještaji o pregledu, odnosno izvještaj o reviziji sa nalazima revizije, mišljenjem revizora i preporukama stranci da treba postupati u skladu sa odredbama člana 11. stav (3) Zakona o finansiranju političkih stranaka. Nakon izvršenog pregleda godišnjeg finansijskog izvještaja za 2008. godinu stranci je data preporuka da treba postupati u skladu sa odredbama člana 8. stav (1) Zakona o finansiranju političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2009. godinu, utvrđeno je da BOSS – Bosanska stranka – Mirnes Ajanović nije ispoštovala preporuke revizije, te da je i u 2009. godini postupila suprotno odredbama člana 8. stav (1) Zakona o finansiranju političkih stranaka.

5. NALAZI I PREPORUKE

5.1. NALAZI

- a) **Revizijom godišnjeg finansijskog izvještaja utvrđeno je da je BOSS – Bosanska stranka – Mirnes Ajanović prekršila odredbe člana 8. stav (1) Zakona o finansiranju političkih stranaka.**¹

¹ Državni, entitetski i kantonalni organi, organi opštinskih i mjesnih zajednica, javne institucije, javna preduzeća, humanitarne organizacije, anonimni donatori, vjerske zajednice, kao i pravna lica u kojima uloženi javni kapital iznosi najmanje 25% ne mogu da finansiraju političke stranke.

- Stranka je ostvarila zabranjen prilog koristeći bez naknade poslovne prostorije koje su u vlasništvu Općine Donji Vakuf.

Na Zahtjev Centralne izborne komisije BiH, Općina Donji Vakuf je dostavila akt broj 02-05-1184/10 od 04.05.2010. godine u kome je navela da je BOSS – Bosanska stranka – Mirnes Ajanović za svoj rad koristila poslovni prostor, koji je vlasništvo opštine, površine 15 m² bez plaćanja zakupnine.

U istom aktu Općina navodi i to da političke stranke koje koriste opštinske prostore ne posjeduju ugovore o zakupu niti rješenja o dodjeli poslovnih i kancelarijskih prostora iz razloga što Općina Donji Vakuf nije donijela odluku o kriterijima i mjerilima dodjele u zakup poslovnih prostorija Općine Donji Vakuf, niti postoji drugi odgovarajući opći upravni akt koji reguliše ovu problematiku.

- BOSS – Bosanska stranka – Mirnes Ajanović je na osnovu Ugovora o zakupu poslovnih prostorija broj: 17-23-10622, zaključenim 27.11.2006. godine sa Općinom Tuzla, koristila poslovni prostor površine 98,76 m², po cijeni koja je ugovorena u iznosu od 1,00 KM po m² i magacinski prostor površine 97,96 m², za koji je ugovorena cijena 0,50 KM po m².

Prema Odluci o davanju u zakup općinskih poslovnih zgrada, poslovnih prostorija i garaža Općine Tuzla (“Službeni glasnik Općine Tuzla”, broj 6/04), najniža cijena zakupnine u II zoni Općine Tuzla iznosi 6,00 KM po m². Istom odlukom je propisano da se za skladišni prostor koji predstavlja građevinsku cjelinu unutar poslovnih zgrada cijena zakupa umanjuje za 50%. Korištenjem poslovnog prostora u 2009. godini po cijeni koja je ispod cijene utvrđene navedenom odlukom, BOSS – Bosanska stranka – Mirnes Ajanović je ostvarila prilog Općine Tuzla u iznosu od 8.864,40 KM.

Obzirom na odredbu člana 4. stav (1) Zakona o finansiranju političkih stranaka kojom je propisano da prilog političkoj stranci, između ostalog, podrazumijeva i pružanje usluga političkoj stranci pod uslovima kojima se ta stranka stavlja u povlašćen položaj u odnosu na druge i odredbu člana 8. stav (1), kojom je propisano da državni, entitetski, kantonalni organi i organi opštinskih i mjesnih zajednica ne mogu finansirati političke stranke, BOSS – Bosanska stranka – Mirnes Ajanović je korištenjem poslovnog prostora bez naknade u Donjem Vakufu i korištenjem poslovnog prostora u Tuzli pod povoljnijim uslovima od tržišnih, ostvarila zabranjen prilog.

5.2. PREPORUKE

Preporučuje se BOSS – Bosanskoj stranci – Mirnes Ajanović da se pridržava odredbi Zakona o finansiranju političkih stranaka, a posebno na osnovu uočenih nedostataka se preporučuje:

- ***da se ne finansira iz izvora koji su političkim strankama zabranjeni članom 8. Zakona o finansiranju političkih stranaka***

KOMENTAR

BOSS – Bosanska stranka – Mirnes Ajanović se aktom broj: 03-07-6-99/10 od 19.01.2011. godine očitovala na Preliminarni izvještaj o reviziji godišnjeg finansijskog izvještaja za 2009. godinu. Uz očitovanje stranka je dostavila obrasce 4-1 finansijskog izvještaja, u kojima je u skladu sa odredbama člana 13. stav (3) Zakona o finansiranju političkih stranaka dobrovoljno otklonila nedostatke², po osnovu kojih je u preliminarnom izvještaju o reviziji stranci bilo stavljeno na teret kršenje odredaba člana 11. stav (3) ovog zakona.

Što se tiče navoda iz očitovanja stranke na nalaze vezane za kršenje člana 8. stav (1) Zakona o finansiranju političkih stranaka, Služba za reviziju je ocijenila da nisu osnovani, te nisu uticali na nalaze revizije navedene u preliminarnom izvještaju.

Činjenica koju stranka navodi u očitovanju, da korištenje poslovnog prostora u vlasništvu Općine Donji Vakuf bez naknade nije zabranjen prilog stranci iz razloga što Općina nije donijela odluku o kriterijima i mjerilima dodjele u zakup poslovnih prostora, je neosnovana iz razloga što je članom 8. stav (1) Zakona o finansiranju političkih stranaka jasno propisano da državni, entitetski i kantonalni organi, organi opštinskih i mjesnih zajednica, javne institucije, javna preduzeća, humanitarne organizacije, anonimni donatori, vjerske zajednice, kao i pravna lica u kojima uloženi javni kapital iznosi najmanje 25% ne mogu da finansiraju političke stranke.

Navodi da stranka nije ostvarila zabranjen prilog time što je Opština Tuzla u Odluci o izmjenama i dopunama Odluke o davanju u zakup općinskih poslovnih zgrada, poslovnih prostorija i garaža Općine Tuzla (“Službeni glasnik Općine Tuzla”, broj 5/05), za političke stranke utvrdila zakupninu od 1,00 KM po m² i time ih stavila u povlašten položaj u odnosu na druge korisnike kojima se zakupnina utvrđuje u rasponu od 3,00 - 15,00 KM po m² u zavisnosti od položaja, lokacije i spratnosti poslovnog objekta, nisu uticali na nalaz revizije iz preliminarnog izvještaja. Odredbama člana 4. stav (1) Zakona o finansiranju političkih stranaka je propisano da prilog političkoj stranci između ostalog podrazumijeva i pružanje usluga političkoj stranci pod uslovima kojima se ta stranka stavlja u povlašten položaj u odnosu na druge.

BOSS – Bosanska stranka – Mirnes Ajanović koristi poslovne prostorije u II zoni Općine Tuzla po cijeni od 1,00 KM po m², dok za druge korisnike koje Opština nije stavila u povlašten položaj najniža cijena zakupnine iznosi 6,00 KM po m².

Zahvaljujemo se osoblju BOSS – Bosanske stranke – Mirnes Ajanović na korektnoj saradnji tokom obavljanja revizije finansijskih izvještaja.

Mr. Hasida Gušić, Šef Službe za reviziju, revizor

Amela Batuša, pomoćnik revizora

² Prije izricanja kazne ili preduzimanja administrativne mjere, Centralna izborna komisija BiH nastojaće da postigne da politička stranka za koju je ustanovljeno da je prekršila odredbe ovog zakona, dobrovoljno otkloni uočene nedostatke, ako su oni otklonjivi.